

CAMBIO DI MANEHO DI ISOLACION Y CUARENTENA PA PASADIANAN, CENTRO DI CUIDO DI MUCHA Y INSTITUCIONAN EDUCATIVO

Crisis team ta participa cambio den maneho di Isolacion y Cuarentena pa Pasadianan, Centro di Cuido di Mucha y Institucionnan Educativo conforme e press release di crisis team 30 di december 2021.

Isolacion

Na momento cu un mucha haya un resultado positivo di un test pa SARS-CoV-2, su mayor of voogd mester pone e mucha den izolacion pa 5 dia y purba di evita mas tanto posibel pa e bin den contacto directo cu demas persona den cas. Su dianan di izolacion ta cuminsa conta for di e día cu e haya su resultado positivo.

E mayor of voogd mester avisa scol of centro di cuido di mucha momento cu e mucha bay den izolacion y manda scol of centro di cuido di mucha e prueba di e resultado positivo.

Si despues di 5 dia e mucha ainda tin sintoma relata na Covid-19, e mester keda den izolacion te ora cu e no ta sinti sintomanan (tosamento, keintura, nanishi ta core etc) mas durante un periodo di por lo menos 24 ora.

Momento cu e mucha completa 24 ora sin sintoma, e mayor of voogd mester yena e formulario cu a ricibi den e email.

Cuarentena

Tur **esnan cu ta biba cu un persona positivo** den cas mester bay den cuarentena obligatorio pa 5 dia cuminsando for di e dia di e ultimo contacto cu e mucha positivo. Mester haci uzo di tapaboca den cas di e mucha positivo na tur momento. E mayor of voogd di e mucha infecta tin e responsabilidad di informa esnan cu ta biba cu e mucha den e cas di e informacion aki. E mayor of voogd mester avisa scol momento cu un mucha bay den cuarentena. E protocol di izolacion y cuarentena ta inclui den e email cu ta ser manda pa e mayor of voogd di e mucha positivo. Nos ta pidi mayor of voogd encarecidamente pa yena e formulario cu a ricibi den e email menciona y manda e informacion di tur esnan cu mester bay den cuarentena obligatorio dor cu nan ta biba den cas cu e mucha positivo.

Procedura pa Pasadia, Centro di Cuido di Mucha y Institucionan Educativo

Ta importante pa pasadianan, scol of centro di cuido di mucha avisa mayornan cu tin alumno positivo den e klas of grupo.

Cuarentena obligatorio no ta conta mas pa Institucionnan Educativo.

E uzo di tapaboca ta obligatorio pa alumnonan di scolnan basico, secundario y otro Institucionan Educativo avansa. E uzo di tapaboca pa alumnonan di scolnan preparatorio (kleuter) ta opcional.

No ta permiti alumno of personal malo na Pasadianan, Centro di Cuido di Mucha of Institucionan Educativo.

Tene cuenta cu Sección Cuido Salud Hubenil di Departamento di Salud Publico no lo tuma contacto cu mayor-, voogd- of scolnan tocante cuarentena obligatorio. Ta consehabel pa tur docente y trahadornan pedagogico uza un tapa boca durante orario di trabou. Nos ta pidi tur dunador di trabou pa coopera cu mayornan cu tin yiu(nan) den cuarentena obligatorio.